

# BUNJEVAČKO ŽACKALO

CINA

2

DINARA

JEDINI PRAVI BUNJEVAČKI LIST

Žacka dvaput misečno

Subotica, 3 veljače 1940

## Bunjevci na okup!

Kako je već i Neven otišao u Hrvate, to je urednik ovog lista rišio, da izda pravi pravcati bunjevački list, koji će imati taj zadatak da kao jedini list bunjevačkih Bunjevaca, čiji je broj ogroman, štiti njihov interes. Da je ova akcija zaista naišla na puno razumivanje kod širih slojeva bunjevačkog naroda svidiće i mnogi pozdravnih telegrami najvidjenijih i najpoznatijih pristavnika bunjevačkih Bunjevaca. Evo nekoliko tih telegrama:

Kako su svi pristavnici Bunjevaca, koji su po svojoj sposobnosti, kulturi, čestitosti ma i približno bili ravni meni prišli Hrvatima to, smatrajući sebe za jedinog pristavnika bunjevačkih Bunjevaca, najodlučnije protestiram protiv toga, da smo mi Bunjevci tobože niki Hrvati, te pozdravljam akciju Bunjevačkog Žackala i postaraću se, da i za G. urednika čim budem ponovo izabran za poslanika isposlujem kontingent za nekoliko vagona svinja. Ujedno molim g. urednika, da mi se javi radi pripomoći iz ledenog fonda.

Čestiti bać Marko Jurić s. r.

Kao jedini pristavnik bunjevačkih Bunjevaca (pošto bać Marka moja žena Lujza ne trpi i ne priznaje) čestitam Bunjevačkom Žackalu na hrabrosti i na smilom držanju. Samo tako naprid do konačne pobide.

Dr. Poljaković Lujzin Ivan s. r.

Ma jes', bogati, gosp. uredniče, kad ve nećeš da budeš Srbin, a ono i pravo je, da ostaneš Bunjevac. Samo nemoj, molim te ko Boga, u Hrvate.

Boško Nikolić s. r.



Svi neka idu u Hrvate, ali mi senćanski Bunjevci nikad.

U ime senćanskih Bunjevaca:

Rosenduft Nathan s. r.

Još mi samo to fali da moram naučiti divaniti i horvacki. Dosta me je muke stalo dok sam naučio ovako lipo i bunjevački da divanim. Ta Horvati ni nemaju tako lipe izraze kao mi Bunjevci, napr. poštovano publika, anamet, istorija dana itd. Kako to Horvati i divanidu kad nemadu ovako lipe izraze?

Čestitam Vam g. uredniče i čuvajte naše bunjevačko ime, koje su nam naši pradedovi ostavili u anamet.



Pritsednik:

Dr. Lipozencsich Lacika s. r.

Oerueloek hogy huek maradtak a bunye-ostaneš Bunjevac. Samo nemoj, molim te ko Boga, u Hrvate.

Dr. Meznerich s. r.

a „Bunjevácok“ irója



# SPOLJNA POLITIKA

## Kako to da pod diktaturom nigdi nema opozicije?

ODGOVOR:

Došao ljudožder u Africi kod misionara i traži, da ga ovaj pokrsti.

— Može, — reče mu misionar, — ali, pre no što se pokrstiš, idi pa se izmiri sa svima tvojima neprijateljima.

— Ja nemam ni jednoga, — odvrati ljudožder.

-- Kako je to moguće? — upitaće začudjeno misionar.

— Sve sam ih pojio, — odvrati ravnodušno ljudožder.

## Javlja ju iz Amsterdama

Holandjani, prije no što su izgradili ona svoja poznata postrojenja pomoću kojih mogu, da svoje granice prema Nimačkoj priltvore u vodu i blato, poslali su nekoliko svojih stručnjaka da prouče ulice u Keru, Gatu, Bajnatu, Vučidolu i Seged. vinogradima. — Holandjanski stručnjaci izrazili su svoje divljenje i čestitali su purgermajstoru na ovakom savršenom odbranbenom pojasu kojim je okružena Subotica. Oni tvrde, da nema te vojske na svitu, koja bi moglo prodrin u centar grada Subotice. Nadalje su izjavili,

da, iako raspolazu sa savršenim tehničkim sredstvima, nisu u stanju da svoju granicu na sličan način utvrde. Tražiće priko Društva naroda, da im se ustupi renomirani stručnjak za ove poslove Ing. Dr. Petrović Kosta.

Kako saznajemo, gerčani, gaćani, bajnaćani itd. spremaju protestnu deputaciju sa lozinkom: „Nosite koga hoćete, al' Kostu ne damo.“

## New-York

Federalna banka u Americi pozvala je Jaramazović Kolomana glavnog blagajnika grada Subotice za blagajnika, pošto se je

njen sadašnji blagajnik pokazao kao nesposoban za vodjenje blagajne te najveće banke na svitu.

## London

Times iz Londona pozvao je Stipu Pavlinu za saradnika, jer su u Londonu saznali, da je ovaj nenadmašan u slanju objektivnih i umirenih visti i da je svojom saradnjom u velikoj miri podigao nivo Hrvatskog Dnev-

nika. Osim toga nikad, kao što ni politika Engleza, ne minja svoj pravac, jer je od doba kad je bio desna ruka Selimira Ostojića i najbolji prijatelj Rade Lungulova ostao isti. Potpuno isti.

ČITAJTE I ŠIRITE JEDINI PRAVI

BUNJEVAČKI LIST BUNJEVAČKO ŽACKALO

# UNUTARNJA POLITIKA

## Imaćemo uskoro izbore

Poznato je, da je Djido prilikom decembarских izbora hodao u papuči na jednoj nozi, a sa drugom u čizmama. Kako je ovih dana na pijaci kupio cio par papuča, a jednu čizmu je dao šusteru da obnovi djon, to u političkim krugovima zaključuju da su izbori na pragu. Medjutim njegov pretelj Ivan izjavio je, da će on kupiti dva para papuča

i da će na obe noge navući papuče kako bi parirao Djidu.

★

Marko Jurić je vidjen ovih dana na groblju. Neki ovu pojavu tumače time, što su u izgledu skori izbori, pa je bač Marko učinio positu kod svojih birača.

## Zašto svuda posli diktature tako teško daju demokratske zakone?

ODGOVOR:

Cigi se dosadilo živiti, pa odluči da se obisi. Uzme štrangu i ode u šumu. Sveže sebi štrangu ispod pazuha pa se tako obisi o jedno drvo. Naišao drugi cigo pa ga zapita:

— Šta ti tu radiš?

— Eto obisio sam se.

— Zašto ne metneš štrangu oko vrata?

— Probao sam i tako, ali onda ne mogu da dobijem vazduha.

## Javljanju iz Šandora

Po ugledu na svog vrhovnog starešinu, koji je kao što je poznato poljubio Mačeka,

pop Staniša iz Šandora odlučio je, da na svoju Slavu pozove Djidu i da ga poljubi.

## Zašto naša administracija i najjednostavnija pitanja komplikira, umisto da ih riši na najbrži i najjednostavniji način?

ODGOVOR:

Imao cig lip štap sa srebrnim drškom. Ovaj svoj štap osobito je volio. Jednom prilikom reče svom kumu:

— Volim ovaj štap, ali samo da je malko kraći.

— A ti ga skрати, — savituje mu kum.

— Ja bi ga skratio, ali mi je žao otsići ovaj lip srebrni držak.

— Ti ga skрати odozdo, reče mu kum.

— To neću, jer doli je sasvim dobar, samo je gori visok.

# Šta veli naš Bodo

Faljen Isus i Marija!

Kad sam čuo da ćete izdavati novine, oma sam reko: fala bogu što ćemo već jedared i mi Bunjevci imati edan pravi bunjevački list u kojim ćemo se moći malo ako drugo ne a ono bar da se malko edno drugom potužimo. Čito sam u novinama da se Srbliji skupljaju, el kažu boje se nas Bunjevaca, ili kako se to moderno kaže Horvata. Pa i imaje ljudi pravo sačuvaj Bože da mi dobijemo vlast u ruke šta bi oni siromasi radili, već tako su lipo naučili da vladaju nama u Subotici, a i lipše je da nji pet šest hiljada vladaju nad nama šesdeset hiljada Bunjevaca, to je bar demokracija, a gospodar onaj Drago koji vodi sad Srblije uvik je bio demokrata pa zna šta radi. On je za sporazum Srbalja i Bunjevaca u Subotici, Bunjevci će dati glasački narod a Srbliji vodje, svaki ono što ima pa mirna Bačka. Kad je već rič od Bačke čuo sam da je i gospodar Mirko napiso članak u listu Dan i da je u tom članku Srblijima reko dobar dan a Bu-

njevcima Faljen Isus, a Horvatima Bog i Hrvati, već svakom kako priliči. Ja istina nisam čito taj članak el ne znam ćirilicu, al kad sam čuo šta je napiso sitio sam se oma onog gladnog i ozebnutog cige koga su upitali šta bi većma volio grijat se el slanine ist, a on ni pet ni šest već da bi volio pržiti slanine, el bi onda i jio i grijo se ujedno. Tako i Mirko. On bi bio i Hrvat, al za svaki slučaj oće da se osigura, ne daj Bože nevolje, i kod Srbalja. Ako bi Subotica potpala pod Horvatsku on bi reko: pa ja sam uvik bio Hrvat, a ako pak pod Srbiju, onda: ja sam uvik bio za Srbiju. Badava politizirat triba znat a Mirko zna, on ne secuje na ednu kartu sve, a sad zbogom pozdravlja vas

**Bunjevčić Bodo,**  
političar novog kova  
i majstor slova,  
seljački pisnik,  
lipšeg doba visnik.

**Kako su Rusi primili vist da će Madžarska oštro istupiti protiv svakog pokušaja Rusije da predje Kárpate?**

ODGOVOR:

U jednu radnju za pranje i glačanje rublja udje jedan dječak i reče:

— Poručio vam je moj otac da će, ako mu još danas ne operete i ispeglate košulje, doći ovamo pa će vas isprebijati i razlupati vam radnju.

— A koji broj kragne ima tvoj otac? — upita gazda radnje.

— Trideset i šesti — odgovori dječak.

— Onda mu reci neka slobodno dodje.

## Razgovor na Nevenovom koncertu

Dvi prijateljice prisustvuju na jednom Nevenovom koncertu.

— Jesi li pokušala kadgod, — pita jedna od njih drugu, — da slušaš koncert zatvorenih očiju?

— Jesam, — odgovara druga.

— A jeste li pokušali kadgod, — javlja se jedan tihi glas iza njih, — da slušate koncert zatvorenih usta?

# Književnost i umitnost

Ovogodišnju Nobelovu nagradu za književnost dodiliće Lazici Stipiću za njegove književne radove objavljene u časopisu „Glas.“

## Pisme bunjevačkih pisnika

Iako su, to svi znate,  
Svi već prišli u Hrvate,  
Ipak moja virna lira  
Uvik bunjevački svira,  
Ona baš nikog ne dira,  
Samo meni dajte mira.

Lazica Stipić

Jutro, dan, noć  
Da mi je kud poč'  
Gdi ću pivat' moć'

Blaško Vojnić Hajduk

Profil mi baš ni lijep,  
Vidi te ko nije slijep.  
Hrvatski vam pišem ja  
O čemu? — samo Bog zna.

Moco Vujković Lamić

## Kako je pivao Balint Vujkov prije

Gromovi pucajte, majku vam vašu,  
Spasite bednu sirotinju našu,  
Ubijte popove, gospodu, lopove . . .  
Uslišite naše siromaške snove.

## Kako piva sad, pošto se već smistio u jednoj kapitalističkoj advokatskoj kancelariji

Dok sam bio mladjan momak ja,  
Socijalista sam bio ja.  
Sada, molim, neka se to zna,  
Biću onog koji više da.

Sa radošću smo primili vist da su našeg učenog sina i filologa Dr. Lipozencsich Laticu pozvali univerziteti u Beogradu i Zagrebu za redovnog profesora hrvatskog jezika.

## Ko će s kime povesti Poklade

Marko Jurić —

s Djidom, a Ivan Ivandekić sa obojicom  
Dr. Maća Evetović —

s Kostom Petrovićem  
Gavro Čović —

s Nestorom Segedinskim  
Mićo Skenderović —

s Fenšegom  
Rada Lungulov, Dr. Draga Dimitrijević i

Dr. Rada Miladinović —

s Bunjevcima Hrvatima

## Ko kako piva

Tuko i Gubeš:

Hop hip,  
Nisam lip,  
Al' sam niki zgodan.

Gavro Čović:

Pošto imam lipi brk,  
Zato sam vam tako mrk.  
Moja pasija je šport,  
Od mene svak' ima zort.

★


Knjigu piše Maća filozofe,  
Knjigu piše i njome se diči:  
Bunjevci su hrvatskog porikla,  
Dš „rac“ je iz „Hrvata“ nikla.

## Čik pogoditi ko je

Voli lijepe žene, mlade,  
Troši mnogo pucpomade,  
U lov ići dobro znade,  
Veze dobre svud imade.



# ŠPORT



**Nov fenomen u skakanju.** Ivan Ivandekić priko bać Marka i svoga brata Mirka skočio je iz Malog Idjoša upravo u sinatorsku stolicu. Za ovaj skok zainteresovao se čak i Owens prvak u skoku u daljinu na prošloj olimpijadi u Berlinu.

**Nov igrač Bačke.** Uprava Bačke povelala je pregovore sa poznatim driblerom Šokčić Josom. Izgleda da će se pregovori uspišno završiti, ali Šokčić više neće moći da drib-

luje, jer će iz navale biti povučen u odbranu.

**Jedno lipo priznanje savisnom i objektivnom radu.** Pošto se je na prijateljskoj utakmici Bačka—Jugoslavija pokazao kao izvrstan i objektivan sudac, Gradjanski i BSK odlučili su da u buduće na sve svoje utakmice pozovu za sudiju Mocu Vujković Lamića.

## Mali oglasi o velikim ljudima

Dajem časove iz srpsko-hrvatskog jezika.  
Dr. Lipozensich.

★

Iako je najučeniji medju Bunjevcima, svoga brata Mirka dao bi u zamenu za 5000 sigurnih glasova. Ivan Ivandekić.

★

Tražimo Bunjevca neokaljane prošlosti, koji je popularan i inteligentan, koji hoće da ostane samo Bunjevac bez dodatka „Hrvat“, a kome parola „Srbi na okup“ nije nesimpatična. Može da postane i ministar i senator, što god hoće. Upitati kod Boška i Rade.

★

Bunjevačkim Bunjevcima kao i organizatorima akcije „Srbi na okup“ rado ću pozajmiti Ivana Tolja i Stipu Pavlinu. Ko manje da neka ih nosi. Za cubok dajem još i Doljanina. Informacije daje Djido.

★

Bivšim integralcima, Bunjevcima, radikalima i t. sl. dajem jeftino informacije kako će na lak način postati Hrvati. Joso Šokčić.

★

Ivanu Ivandekiću i Djidi nudim moj kaput i šepicu od strigana u po cine na prodaju. Ponude slati Radi Lungulovu pod šifrom „Alaj moje za malo bijaše.“

# Domaće vesti

## Zašto je nikim krugovima u Subotici teško da se pomire time da i Subotica pripadne Hrvatskoj Banovini?

ODGOVOR:

Obilazeći svoje virnike dodje rabin u jednom selu kod jednog svog virnika. Ovaj ga lipo primi i počasti sa jilom i pićem. S jednom riči primi ga kao svog najdražeg gosta. Rabinu se osladi ovako gostoprinstvo, te ostane u gostima priko nedilju dana. Kad je već pojo sve što je domaćin imao u kući, najavi da će sutra dan oputovati, te zamoli domaćina da ga rano, još prije zore, pro-

budi.

Domćin sav radostan što će ga rabin najzad napustiti, sutradan ujutro pokuca na vratima svoga gosta:

— Gospodine rabine, molim vas ustanite, odmah će svanuti, jer je pivac već triput kukurikao.

— Šta? — Zapita začudjeno rabin. — Imaš još jednog pivca? Onda još ne idem, — i nastavi mirno da spava.

## Ko o čemu sanja

Dr. Mirko — o javnobiležničkoj stolici i o hrvatstvu izraženom ekavski, pisanom ćirilicom i naslonjenom na Beograd.

Ivan Ivandekić — o doživotnom sinatorstvu.

Bać Marko — o kontingentu i ledenom fondu.

Joso Šokčić — isto o čemu Dr. Mirko ali bez javnobiležničke stolice.

Rada Lungulov — o Dontovom sistemu. Dr. Aleksa Ivić — o katoličkim Srbima u Subotici.

Bunjevačko Žackalo — o velikom broju pritplatnika.

## Po čemu se poznaje Jugoslovenski orijentisani Bunjevac?

ODGOVOR:

Po tome što govori ekavski, piše ćirilicom i mrzi Hrvate.

Bićeš elegantan kao  
neki grof  
ako kupiš

**Teokaroviće**  
Š T O F

Ženska stara ili mlada  
Kupuje u drogeriji

**„NADA“**

Bićeš lipši, pa i tvojoj curi sladji,

Ako kupiš odilo kod firme:


**Tumbas i Rujundžić**

M L A D J I

Triba li ti posudje  
Nemoj da se misliš,  
Već idi pa kupi kod

**Firme: PRČIĆ – ŠIFLIŠ**

Zašto antialkoholičarski pokret  
slabo nalazi pristalice  
među Bunjevcima



ODGOVOR:

Učitelj u školi drži predavanje djeci o štetnom uticaju alkohola, te veli da je već i priroda tako stvorila živa bića da ne vole alkohol. Iznosi ovaj primjer:

— Ako ispred žednog magarca stave kabo vina i kabo vode, iz kojeg će magarac piti?

— Iz onog u kojem se nalazi voda — odgovaraju djeca u jedan glas.

— A zašto — pita učitelj.

— Zato — odgovara jedan od učenika — jer je magarac.